



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tiryimyim@aolima



tir yimyim

TAPAK 7

## ICC Test Team Rankings nung India No.1 kümogo

VOL. XXI ISSUE NO. 148 (ADOK 148) DIMAPUR TENTONÜ (MONDAY)

METSÜREMI (MARCH) 11, 2024

₹ 5.00

## PM Modi-i Nagaland atema Rs 1700 crore mapatong tenzüksü

**Guwahati, March 10, 2024**  
(Agencies): Prime Minister Narendra Modi-i North East nung Rs. 55,000 crore tema endoka yangluba mapatong aika lapoktsüogo.

Iba nung Nagaland nunga Rs. 1,700 crore endoka yangluba mapatongtem dena lir. March 9, 2024 nü Itanagar nung 'Viksit Bharat Viksit North East' sentong nung pai mapatongtem sayatsü.

PM Modi-i Nagaland nung Chumoukedima district kubok Unity Mall aser Dimapur kubok Nagarjan nung 132 kv substation ajungkettsüba lung azüngstsü.

Paisa Chendang Saddle nungi Noklak aser Kohima-Jessami Road dena gari lenmang

## Eastern Nagaland maneni shibangtsü

**Dimapur, March 10, 2024**  
(TYO): Eastern Nagaland People Organization (ENPO)-i "Public Emergency" maneni alitsü aser iba mapang Eastern Naga nunger tesem ajunga mokdangtsü.

India sorkari Ministry of Home Affairs (MHA) ajanga Frontier Nagaland Territory (FNT) ken o mapang atsülangba anema ENPO-i "Public Emergency" sangdongogo.

ENPO-i March 10, 2024 nü sangdong ka nung Power Department, Media houses, Medical Emergencies, Fire & Emergency Services aser Wedding mokdang kubok medendaktsüba metedaktsüogo.

Kin teloktem tsüngda amalitepa mokdang agitsü metedaktsü aser ENPO Control Room, Tuensang Hq. sangdong

## March 15 nü Election Commissioner 2 shimtsü akok

**New Delhi, March 10, 2024**  
(Agencies): Election commissioner Anup Chandra Pandey kumsük agi tonger mapa nungi sodi agiba den Arun Goel-i ajungbena menden toktsüba ajanga March 15, 2024 nü election commissioner ana shimtsü akok.

ECI-i Lok Sabha elections osang metedaktsüba anogo ishika dang lia Arun Goel-i kanga dang ajungbena election commissioner nungi sodi agi. President Droupadi Murmu-i Goel indang shidi agizükogo aser Law Ministry-ia sangdong ka agütsüogo.

Iba ajanga ECI nung Chief Election Commissioner Rajiv Kumar dang anünga lir.

mapatong aika lapoktsü. Nagaland dak alia PM Modi-i Arunachal Pradesh nung Rs. 41,000 crore, Manipur nung Rs. 3,400 crore, Meghalaya nung Rs. 290 crore, Sikkim nung Rs. 450 crore aser Tripura nung Rs. 8,500 crore tema indang mapatongtem sayatsüogo.

Honibarnü PM Modi-i 'UNNATI- Uttar Poorva Transformative Industrialisation' scheme tenzüksü. Iba ya Centre-i Rs. 10,000 crore agüja Northeastern state ajak nung inyaktsüba scheme ka lir.

"Northeast ya India'er trade, tourism aser regional relations nung tongti sentaktepba tesem ka asütsü aser sorkari maneni temulung agütsütsü" ta PM Modi-i metedaktsü.

nung shiogo. Chang Khulei Setshang aser Phom Peoples' Council ajanga sangdong balala nung Eastern Nagaland Public Emergency maneni alitsü metedaktsüogo.

March 11 ayaterm (12:00 am) nungi Chang aser Phom nunger tesem ajunga mokdangtsü.

Iba mapang public, nije aser sorkar garitem mesenzütsü, sorkar aser nije aser sorkar rejutem melapoktsü, school aser college ajak shibangtsü aser shishilembadak melapoktsü ta parnoki metedaktsüogo.

Ajisüaka mokdang kubok Power department, Medical emergencies, Fire and emergencies, Media house aser Wedding madentsü ta CKS aser PPC ajanga metedaktsü.

Law Minister Arjun Ram Meghwal den Home Secretary aser Department of Personnel and Training (DoPT) Secretary na adenba search committee kati tamasa election commissioner ana atema tenüng pungugu shimtsü.

Iba sülen Prime Minister aser Union minister ka den Lok Sabha nung Leader of the Congress Adhir Ranjan Chowdhury nunger adenba selection committee kati election commissioner inyaktsü nübo ana jatetsü aser President Murmu-i tena shimtsü.

March 13 mesüra 14 nü selection committee ajurutepa senden amentsü aser March 15 nü nubo shimtetsü akok ta osang angazüker.

## AASU-i CAA anema ghonda 12 lumia lungkak ait



**Guwahati, March 10, 2024**

(Agencies): All Assam Students' Union (AASU) den telok 30-i Assam kubok tesem balala nung Citizenship Amendment Act (CAA) anema lungkak aitba sentong ka agiogo.

AASU-i anir teloktemi tanep 6:00 ako nungi Guwahati, Dibrugarh, Bilasipara, Kokrajhar, Golaghat, Nalbari, Chiradeo aser tanga district headquarters nung lumia lungkak aitba sentong ayonga agi.

Union Home Minister Amit Shah-i Lok Sabha elections magidang CAA mapa tenzüksü ta shiogo aser AASU-i iba anema lungkak ait.

"Assam-i CAA magizüker. BJP-i Assam nung lisopurtem (jati, mati, bheti) kümzüka ayutsü ta nangzükba ashirktsü aser Assam nunger taginüba denbo vote bank politics inyaker" ta AASU general secretary Shankarjyoti Baruah-i ashi.

"Prime Minister Narendra Modi, Home Minister Amit Shah aser Union Minister Sarbananda Sonowal nungeri Assam nunger ashioktsüogo" ta Baruah-isä ashi.

"Onki iba ya kodanga mamatsü aser tatok magütsü. Parnoki CAA benokra Lok Sabha elections nung onoki BJP nem telangzüba agütsütsü" ta pai ashi.

CAA ya Assamese maitsü atema lendong lir aser ozü state

nung Assamese nunger nübo tajemba akümtsü ta Baruah-isä ashi.

BJP sorkari iba act pusemba aitsür aser iba ya Assam secular fabric, Constitution aser Assam Accord anema lir, ta paisa ashi.

CAA ya Assam nung ashishitep aketba onük ka lir kechiyong Assamese nunger aikati 2014 matongdang kidanger linüktem nungi aruba non-Muslim migrants nem senso agütsütsü memulunger.

March 7, 2024 nunga Dibrugarh, Kokrajhar aser tanga district aika nung motorcycle rally ka ayonga agiogo. Item sentong nung AASU lennirtem aser activists-i shilem agia liasü.

"CAA ya Arunachal Pradesh, Mizoram, Nagaland aser Manipur dena Northeast nung inner-line state tem nung mebenshitsu. Constitution of India nung sixth schedule kubok adenba district tem aser Assam kubok hill district asem nunga iba ozüng mebenoktsü" ta AASU Chief advisor Samujjal Bhattacharya-isa metedaktsü.

"CAA ya Mizoram mesüra Arunachal Pradesh nung majung süra, kodaser Assam nungbo tajung? Assam kubok Kokrajhar aser Karbi Anglong nung majung süra kodaser Nagaon aser Kamrup nungbo tajung?

Nisungtem bendendak tesem mekümdaktsütsü" ta Samujjal Bhattacharya-isa metedaktsü.

"Northeast ya linük kubok tanga tesemtem den khenyongi balaka kechiyong idakji ozüng alema arur teimba lidaktsü.

Centre aser GPRN/NSCN tsüngda ken o angatetteptsü lenmang bushiteptsü atema ceasefire atsülangtsü lemte.

Telok anaprong sign sütepa aliba Ceasefire Ground Rules (CFGR) nung lateta aliba ama ceasefire alitsü. Centre aser

Assam movement ka liasü aser sorkari 1980s nung Assam Accord sign sütep. Onoki CAA anema tatem tashi lungkak aittsü" ta paisa ashi.

### CAA ya ozüng kümogo: CM Sarma

"Citizenship Amendment Act (CAA) ozüng latetogo aser joko iba anema noktaktsü kuli kecha mali" ta Assam Chief Minister Himanta Biswa Sarma-i ashi.

"CAA ozüng kuma yanglur küm ana tema arur aser iba anema lungkak aitbaji nüngdak mali. Kaketshir teloktemi CAA anema mokdang mayongtsüla" ta CM Sarma-i Deobarnü ashi.

Opposition party temi CAA anema lungkak aittra onoki Election Commission tsüngdang ken o benoktsü aser iba ajanga parnok party symbols sota ayutsü akok, ta paisa ashi.

"Asenoki Assam nung terenlok maparen nung temulung agütsütsüla. Tang sen crore meyirjang aika indang mapatongtem inyakdar aser iba ajanga infrastructure o economy ajungkettsü. Terenlok ngua aoba mapang ka nung CAA anema maneni lungkak aitba ya tesüngmangtsüka lir" ta pai ashi.

"Lungkak aittsü temeten lir saka CAA anema noktakertemi Supreme Court ajanga teyari bushitsüla. Tesüiba nung Illegal Migrants Determination by Tribunals (IMDT) Act anema ken o tem benokogo" ta paisa ashi.

"Ni lungkak aitertem akhümtsübur saka parnoki Supreme Court tsüngdangi aotsüla" ta Sarma-i ashi.

## Centre-i GPRN/NSCN den ceasefire atsülangter

**Guwahati, March 10, 2024**  
(Agencies): Centre sorkari Government of the People's Republic of Nagaland/National Socialist Council of Nagaland (GPRN/NSCN) den ceasefire tenangzütep atsülangba osang metedaktsüogo.

April 28, 2024 nungi April 27, 2025 tashi GPRN/NSCN den

küm ka ceasefire atsülangba osang metedaktsü.

Centre aser GPRN/NSCN tsüngda ken o angatetteptsü lenmang bushiteptsü atema ceasefire atsülangtsü lemte.

Telok anaprong sign sütepa aliba Ceasefire Ground Rules (CFGR) nung lateta aliba ama ceasefire alitsü. Centre aser

GPRN/NSCN ajanga mapang shia iba ya reprangshimtsü sorkar sangdong ka nung ashi.

Iba tenangzütep nung GPRN/NSCN supervisor CFSB Jack Jimomi, secretary Chubatosh Tungoe aser Ministry of Home Affairs (MHA) additional secretary Piyush Goyal nungeri sign süogo.

## IRCS ajanga Champang nung medical camp ayongzük



**Dimapur, Metsüremi/March 10 (TYO):**

Indian Red Cross Society, (IRCS) Wokha District Branch ajanga March 9, 2024 nü Bhandari sub-division kübok Champang Headquarter nung Medical Camp ka ayongzükka liasü, kong tetushi tesendanger ka ama Deputy Commissioner, Wokha aser Chairman IRCS, Wokha Branch, Ajit Kumar Ranjan, IAS dena liasü.

Iba camp tenzükba sentong nung jembidang IRCS Wokha team ajanga taten maai ajungben rongdak mapang aser junga alidanga Wokha district nung service balala agütsüba atema Deputy Commissioner, Wokha ajanga tenüngsang agüja liasü.

Parnoki meta talang nung aliba Champang Hq tonga arua nüburtem nem healthcare services agütsüba asoshi pelaba lemsatep.

Ajidang masü, lemtematartem, tantsür-tambortem aser makamai jenjang nung alirtem temang reprangi pei ki yutsür moteti alirtem asoshi bilemja tonga aruba atema DC Wokha ajanga pelaba ashi.

Wokha district nung Bhandari ya kanga tongtipang sub-division ka lir, aser iba district ya tulu, tatsük aser nütsüng yongsük jenti lir, anungji yimtsüng karbo tonga moteter, anungji temulung agüja item tesemtem nung healthcare machinery agütsüdaktsüner, ta DC-isa iba sentong nung dena alisang CMO Wokha dang ayongzük.

Champang ya Dengue aser Malaria kanga mela adoktsüla tesem ka lir, anungji tang agütsüba ama pei kishizüng nung arua medical camp katsüba nungi health care facilities agitsüla, ta pai

nüburtem ayongzükka liasü.

DC & Chairman IRCS, Wokha, Ajit Kumar Ranjan-isa CMO Wokha dang nüburtem ajangzüktsü mechı Chief Minister Health Insurance Scheme (CMHIS) atema Beneficiaries Identification System (BIS) drive aotsü ajungshia liasü.

IRCS Wokha team ya Dr. Zumomo Ovung, Secretary, IRCS Wokha Branch lenisüba kübok liasü aser iba medical camp nung arua adenba den lenmang balala nung yaritepbä aser ajungmesoba atema Deputy Commissioner aser Chairman, IRCS Wokha Branch dang pelaba lemsatepa liasü.

Iba sentong nung Champang village council chairman-i doctor ka danga aginer ta ashi aser Medical department dang tekeratiba nung doctor ka danga yoktsü mepishia liasü.

Iba Medical Camp nung CMO Wokha headquarter aser CHC Bgandari nungi doctor aser para-medical staff temi yaritepa liasü aser iba mapang nisung 150 dak tema angati temang repranga mozü angati agüja liasü.

Iba sentong nung teintet rogo, lemta-matar aser teshimtet nisung kar nem health care aser livelihood relief materials tem agüja liasü

Dimapur nung mejangjaba nisung tasümany ka nguteta lir

**Dimapur, Metsüremi/March 10 (TYO):** DC Court area nung Traffic Point Dimapur anasa mejangjaba nisung, tebur ka sūchia orr longdaka lir ta Honibar anepdang 10:10 ako meta telephone ajanga osang ka aruba sülen duty party tem arsanga ao aser yangji arishi küm 45-50 tsüngta non-local tebur ka sūchia or longdaka aliba angu, ta Dimapur Police ajanga sangdong ka nung ashi.

Iba nisungba ya tola tememsüng, long sleeve talang aser tanak agi temdanga lir, long pant tanak sema liasü. Kibur, kinunger, tembar temi Officer-in-Charge, West PS Dimapur den mobile number 7085055024 ajanga tongteprateptsü akok, ta sangdong ajangasa ashi.



*Odangchetla Longchari-i züluwa "Love Letters" kaket Café Leon, Hill View Colony, DC Court Dimapur nung March 9, 2024 nü saya liasü. Iba kaket ya Wabang Longchari, Pastor, The Lighthouse Church ajanga sayatsü aser kaket menünger nungi Sentinaro Longkumer, Editor, Heritage Publishing House ajanga jembia liasü.*

## ADC Tizit ajanga draft E-roll atema jangjashitsür

**Dimapur, Metsüremi/March 10 (TYO):**

Tizit Town Council atema draft E-roll adokba indang media nung prokshiba dak senakba nung Additional Deputy Commissioner, Tizit ajanga sangdong ka nung iba osang jangjashitsüo.

Sangdong ajanga ashiba agi, March 8, 2024 anüdok nungi anülu tashi Public Emergency aser Public Bandh ENPO ajanga ayongzükka aser Konyak Union Tizit Unit ajanga mapa kuma inyakba mechı draft E-roll ya March 7, 2024 nü renema ayutsü ADC Tizit indang office ajanga telemeteba agia liasü.

Kasaji photo record agia record atema March 7, 2024 nü tangok aser State Election Commission dangi yoktsü yua lir, ta sangdong ajanga ashi.

March 8, 2024 nü Additional Deputy Commissioner, Tizit

indang office shibanga liasü aser International Women's Day densema March 8, 2024 nü agitsü aliba sentong ajak athi. Anungji NLTV aser social media sapang balala nung Tizit Town Council atema E-roll ya March 8, 2024 nü adokogo ta noksa tem prokshiba ya tiazü lir, ta sangdong ajanga ashi.

March 7, 2024 nü noksa tangokba mapang CSOs, ward ketcangsür, nüburtem mesüra political party tem nungi shinga meliatsü, ta ADC Tizit ajanga sangdong nung ashi.

Anungji March 8, 2024 nü aibeleno osang temai adoka ENPO aser federating unit tem jashidaksüba atema sasa bilemer aser tarutsü nung mera balala agiyonga aotsü atema ENPO den teka amteper aotsü mulunga lir, ta sangdong ajangasa ashi.

**Abu Metha-i GHS Sovima nung 'Apni Pathshala' lapoktsü**

dang technology amshiyim sayua mongin kumdaktsütsü tesayurtem dak keta lir, ta Metha-i ashi.

Iba den külemei pai tesayurtema mapang melenshia aoba den apet lirumedema aotsü nüngdaker, kechiaser parnok ya asüng jenjang yanglur, tarutsü asoshi lenirtem renemshitsürtem lir, ta ashi.

Tanur kija shia balala lir aser tanurtem angatetsü aser parnok nüngdakba ama shisaliok sayutsü tesayurtem mapa lir.

Asenoki nisung shia yimba balala angatetra, education tajungba akumtsü aser tanurtem ainba nunga kongshitsü.

Pai kaketshirtem dang parnoki jembiba nung tamakotsü ta asüba ojang mamshitsü ayongzük, kechiaser takum nung ajak takoktsü lir, ta ashi.

Alima nung takok tulu nguteter aika makamaiter kibong maneni mera agitsüla.

Technology ya kanga tongtipang kumogo, anungji state nunga education computer literacy dendaktsütsüla, kechiaser asenok tejakleni renloka aotsü asoshi lanurtem dak keta lir, anungji kaketshirtem

balala angutsü asoshi tsürabor takar asütsü menüngdak saka meranga inyaktsüla, yimya tajung amshitsüla, bendanga agütsütsüla aser mangdang tajung ayutsüla, ta Abu Metha-i ashi.

Tsürabotemi nenok dak teimla lir, nenok dak tamang akar, anungji nenoki itemji asangsang akumtsü asoshi meranga inyaktsüla, ta pai ayongzükka liasü.

Deputy Director, DOSE & OSD to CM, Nellayappan B ajanga "Apni Pathsala" indang rateta ashiba mapang, iba ya Mumbai nung alir Aniruddha Malpani-i tenzükba project ka lir. Aniruddha Malpani ya medical practitioner aser entrepreneur ka lir.

Malpani-i pa indang rongsen amshia India tesem balala nung aliba kaketshirtem nem computer education

agütsütsü meranger. Iba nükjidong nung pai "Apni Pathsala" amenokner sponsor asü aser yangji computer sets ter den technical teyari aser technical experts temi sayur.

Kaketshirtem tejangraba bushittettsü asoshi technical aser subjects expert temi nüngdakba facilities agütsür. Kasa mapang kaketshirtem dak skills yangerba sayutettsüla, ta pai ashi.

Tang tashinung iba organisation ya India nung iba ama school project 30 lir aser Nagaland nung ibai school pezu buba alitsü.

Mezungubaji Government High School Longleng, aser ano Longleng aser Peren district nungsa private school ana lir.

Tejangja dang süra aser parnoki aginüba ama inyakra, iba organisation yagi school kwi nung südir süaka yaritsü renema lir.



*All Nagaland College Students' Union (ANCSU) kümsük 2023-2024 pur asoshi Union Assembly mezüngbuba March 9, 2024 nü Immanuel College, Dimapur nung mena liasü. Iba senden nung college azünger temi ajuruba ken o balala jembia liasü.*

## Abu Metha-i GHS Sovima nung 'Apni Pathshala' lapoktsü

**Dimapur, Metsüremi/March 10 (TYO):** Advisor to Chief Minister, Abu Metha-i March 9, 2024 nü Chümoukedima district

kübok Sovima nung aliba Government High School nung 'Apni Pathshala' lapokja liasü.

Iba sentong nung jembidang, linük nung school 100 shimba nungi Nagaland nungia iba school shihtetba atema Aniruddha Malpani dang pela liasü.

Alima kanga kera tejakleni aor, internet ajanga meimchir takum melenshitsür aser technology ajanga minute shia asen takum nung kongshir, ta pai ashi.

Technology ya kanga tongtipang kumogo, anungji state nunga education computer literacy dendaktsütsüla, kechiaser asenok tejakleni renloka aotsü asoshi lanurtem dak keta lir, anungji kaketshirtem

dang technology amshiyim sayua mongin kumdaktsütsü tesayurtem dak keta lir, ta Metha-i ashi.

Education tajung agütsütsü ya ki o jen ajungba, facility tajung agütsüba dak tuluka keta lir, saka tulutibaji tesayur dak keta lir, ta ashi.

Nagaland nung government school 1500 dak tema lir aser yangji azünger kaketshir lakkana dak tema lir, aser iba school nung nüngdakbapur nem, talisa yimda yimtsüng nung alirtem nem shisaliok agütsür, ta Abu Metha-i ashi.

Rongren peria manguba nüburtem aser kibong tem government school dak metaloka alir, aser shisaliok tajungba agütsütsü asoshi government institutions, department aser state sorkar maneni mera agitsüla.

Education tajung medeni

asenok tejakleni maotsü, ta ashi.

Iba den külemei pai tesayurtema mapang melenshia aoba den apet lirumedema aotsü nüngdaker, kechiaser parnok ya asüng jenjang yanglur, tarutsü asoshi lenirtem renemshitsürtem lir, ta ashi.

Tanur kija shia balala lir aser tanurtem angatetsü aser parnok nüngdakba ama shisaliok sayutsü tesayurtem mapa lir. Asenoki nisung shia yimba balala angatetra, education tajungba akumtsü aser tanurtem ainba nunga kongshitsü.

Pai kaketshirtem dang parnoki jembiba nung tamakotsü ta asüba ojang mamshitsü ayongzük, kechiaser takum nung ajak takoktsü lir, ta ashi.

Alima nung takok tulu nguteter aika makamaiter kibong maneni mera agitsüla.



March 10, 2024 nü New Delhi nung Congress Tir, Mallikarjun Kharge-i BJP MP, Brijendra Singh party nung agizükang tangokba noksa nung angur. Kasa noksa nung Congresss lenir Mukul Wasnik-a angur.

## Centre-i tetsür crore 3 'Lakhpati Didi' kümdaktsüsü: PM Modi

New Delhi, Metsüremi/

**March 10 (Agencies):**

Amongnū Ato kilonser Narendra Modi-i, linük nung tetsür crore asem "lakhpati didi" kümdaktsüsü atema sorkari nükjidong yuogo aser tetsürtem jenjang ajungtsü atema tongtibangsüa inyaktsü, ta metedaktsü.

Video conferencing ajanga Ato kilonseri Chhattisgarh nung 'Mahtari Vandan' scheme tenzüktsüba sülen jembidang pai, "Tetsürtem nem tashi agütsüsü nükjidong nung tanü Mahtari Vandan scheme tenzüktsüsü asoshi ni maongka tajung nguogo. Iba scheme kubok onoki ita shia tetsür lakh 70 dak tema nem sen meyirjang kaka agütsüsü nangzüka liasü, aser tanü BJP sorkari iba tenangzükba atangji ataloktsüogo," ta metedaktsü.

Iba scheme kubok mezunguba installment nung sen crore 655 tetsürtem indang bank account nung inoktsüogo, ta pai metedaktsü.

"Tanü iba sentong atema ni nenok rongnung densemer lila,

ajisüaka Uttar Pradesh nung ni sentong kar aliba agi marutet. Ni Baba Vishwanath indang lima-Kashi nungi jembir; pai-a nenok nem temoatsü agütsüdar," ta Modi-i metedaktsü.

"Kodang tetsütem aser aianutem nem tashi agütsüdir ibaji ajanga kibong rangben tashi angur. Anungji gol ana aketba sorkari (Centre aser state naprongla nung BJP sorkar) tetsütem aser aianutem jenjang ajungtsü atema tongtibangsüa inyaktsü," ta pai metedaktsü.

"Tanübo kibongtem nem pucca ki agütsür aser ibajia tetsürtem tenüng nung agütsür," ta pai ashi.

"Ujjwala scheme ajanga tetsürtemi jenjang dalang agi soruchiokba gas cylinders angur. Jan Dhan account shilem 50 dak temabo tetsürtem tenüng nung lir aser Mudra loan shilem 65 dak temabo tetsürtemi agiogo," ta pai metedaktsü.

"Tesüiba kum ter tsüngda ozü sorkari self-help groups ajanga tetsür crore 10 dak tema tajangzük ngudaktsüogo," ta pai metedaktsü.

ashi.

"Ozü sorkari meranga inyakba ajanga tetsür crore 1 dak temabo 'lakhpati didi' kümdaktsüogo. Onoki linük nung tetsür crore 3 lakhpati didi kümdaktsüsü nükjidong yuogo," ta pai shisem.

Sorkari 'Namo Drone Didi Yojna' atema inyakdar, iba mapatong kubok drones aser drone pilot training agütsüsü, ta pai metedaktsü.

Modi-i, BJP sorkari tepela aser azükaru agütsüsü nangzükogo aser iba atemaji Chief Minister Vishnu Deo Sai-i aniba sorkari maparen tenzükogo, ta metedaktsü.

'Mahtari Vandan' scheme kubok tetsür lakh 70.12 indang bank accounts nung sen crore 655 inoktsüogo; iba scheme kubok tetsür shia ita shia sen meyirjang kaka (1,000) angutsü, ta state sorkaria sangdong ka ajanga metedaktsü.

Science College ground nung agiba sentong nungji Chief Minister Vishnu Deo Sai den cabinet minister tem densema liasü.

## Mamata Banerjee-i Congress nem Lok Sabha menden melemzüksü

**Kolkata, March 10**

**(Agencies):** Amongnū

Trinamool Congress tongti lenir aser West Bengal Chief Minister, Mamata Banerjee-i taruba Lok Sabha election nung parnoki tanga party den meloktepi tokteptsü metedaktsüogo.

Opposition INDIA teloktep kubok Congress-i West Bengal nung menden lemsatsü imlaa liasü saka imlabi ama mataloker, anungji taruba Lok Sabha election nung West Bengal nung TMC, BJP aser Congress-Left tsüngda tokteptsü.

Tawa Sandeshkhali nung tatalokba atema BJP-i TMC sashia aitsüba mapang ka nung Amongnū West Bengal Chief Minister Mamata Banerjee-i Kolkata nung aliba Brigade Ground nung sentong tuluka ayongzüka agiogo. Iba sentong nungji lai West Bengal nung Lok Sabha menden 42 prongla atema TMC candidate tem tenüng sangdong.

Iba sentong nungji TMC pusemertem meyirjang aika adenshia liasü.

Mamata-i BJP aitsüba den

külemi lai NRC mapatong inyaktsü atema Central sorkar nem temelaba magütsüsü, ta nenshia metedaktsü.

TMC-i Balurghat constituency nung Biplab Mitra toktepdaktsüsü aser Berhampur (Berhampore) menden nung Yusuf Pathan toktepdaktsüsü.

Cooch Behar menden nung Jagdish Basunia-i tokteptsü, Alipurduar menden nung Prakash Barai, Nirmal Chandra Roy-i Jalpaiguri menden aser Gopal Lama-i Darjeeling nungi tokteptsü. Krishna Kalyani-i Raiganj menden, Prasun Banerjee-i Malda North menden aser Shehnewaz Rahman-i Malda South menden nungi tokteptsü.

2014 küm Lok Sabha election nung TMC-i menden 34 nung takok ngua liasü saka 2019 küm Lok Sabha elections nungbo parnoki menden 22 nung dang takok angu. 2019 küm BJP-ia menden 18 nung takok nguteta liasü.

2021 küm West Bengal nung assembly election agia TMC-i takok anguba sülen MLA 8 den MP 2-i TMC nung denogo.



March 10, 2024 nü 65buba 'Tibetan National Uprising Day' anogomong nung Tibet nungertemi Jantar Mantar, New Delhi nung longkak aitdang tangokba noksa nung angur.

## Arun Goel-i EC menden toktsüba atema Centre-i telangzüba agütsüsüla: Owaisi

**Hyderabad, March 10**

**(Agencies):** Lok Sabha

election agitsü hopta ishika dang lia Election Commissioner Arun Goel-i ajungbena menden toktsüba ajanga süngranger aser aoksar, ta shia Amongnū AIMIM Tir, Asaduddin Owaisi-i Narendra Modi sorkari pa anenba kuli metedaktsütsüla, ta takhangba agütsü.

Lok Sabha election agitsü anogotem sangdongtsü atema anogo ishika dang lia Honibarnü Goel-i EC menden nungi anenogo; pa kümüsküji December 5, 2027 tashi liasü aser sangküm February ita nungbo pa Chief Election Commissioner (CEC) akümtsü liasü.

Hyderabad nung osangbenertem den jembidang MP, Owaisi-i, "Election Commission of India-i March 13 sülenbo election anogotem sangdongtsü akok, ajisüaka ibajitongtsü anogo ishika dang

lia Election Commissioner (Arun) Goel-i menden nungi anenba shidi agütsüogo. Pai kechi kuli ajanga anenar onoki memetet. Iba ya teaüngmangtsüka aser taosatsüka lir," ta ashi.

"Pai (Arun Goel) pasasa kuli ashiba tajungba asütsü, mesüra Lok Sabha election agitsü anassa pai anenba kuliji sorkari metetaktsütsüla," ta Owaisi-ashi.

Election Commission telung osang ka ajanga angazükba agi, Goel aser Chief Election Commissioner Rajiv Kumar na tsüngda mangatettep liasü.

Election Commission of India nung CEC den EC ana (zungsem asem) lir, ajisüaka menden ka tazüng lia ano Goelia pa menden toktsüba ajanga Election Commission nung Kumar dang anüngogo, anungji Lok Sabha election agitsü atema anogotem sangdongtsü asoshi anogo mapang atsülangtsü akok.



March 10, 2024 nü Amritsar nung aluyimertemi train lenmang nokdanger longkak aitdang tangokba noksa nung angur.



# TIR YIMYIM

## YIMOBILEM (EDITORIAL)

DIMAPUR TENTONÜ, MARCH (METSÜREMI) 11, 2024

### Mopung tamajung achir

**N**agaland nung Kohima aser Dimapur nung mopung kanga mejungi menena kümogo ta Nagaland Pollution Control Board (NPCB)-i metetedaktsüba asenok ajak asoshi arrsangoktsüba osang ka asütsü. Asenok atema, mechira taküm melitettsüba chiyongtsüji mopung ya lir, anungji chi dang nungibo mopungang tongtibangba akümer. Chi mechiyonga taküm litettsü, kechiyong chi melen achitsüsa chiyongtsü aika lir saka mopung melen agitsüsabo kecha maka, anungji akok tashi mopung ya memenendaktsüsa mopung tajung agia taküm anema alitsü merangtsüba asenok ajak asoshi kanga rongdak nüngdak kümogo. Atangji, Nagaland yabo tangar state aser yimtitem amato masü, mopung menentsüsa industry tulubo kata lapoka mali, ajisüaka Kohima aser Dimapur nung alirtembo mopung tamajung chia alitsüsa akümbaji talirtemi tali mashiba ajanga lir ta angatetri. Ibaji alima tsüngdang taaktsüka lir. Alima nung nisung alidak tzü sang, mopunga sang mesüra kima yimdonga sang, merüka ayutsüba talirtemi dak tuluka keta lir. Ibaji angateta talirtemi pei alidak tzü mopung memenentsüsa inyak nungbo, memeteti aser metetmeteta tzü aser mopung merüketter alitsü. Tang Kohima aser Dimapur nung alirtem temang nung timtem adoktsüsa mopung menendaktsüba mapatemji auyi aser janaona arongba mokozi ajanga lir ta putetter. Atangji, iba yimi ana nung ya anogo shia gari teimba-teimba akümer, anungji garitem nungi tatsük aser mokozi adokba agia mopung menendaktsü. Ano, mopung menentsüsa auyi adokbaji long menüngba tesemtem nungi aser lenmang yanglurtemi lenmang nung black topping mao ser lenmang nung tzü marak toktsüba agi gari ana atongtepa aoa majung auyi adoka longpatsüsa yutsür. Item auyitem ajakji mopung nung senzür aser asenok tenük agia ngua asen teni aser tebang len nungi auyiji iadoker. Iba lagi asen temang telonglen koda menendakja alitsü ta biledangra, nübortemi ola madokyonga long menünger aser lenmang yanglurtemi akok tashi mopung nung auyi meyoktsüsa kümanga inyaktsü, kechiyong mopung menenba ajang pei temang nung timtem ajurutsüba tangar dang nungibo lenmang yanglur aser long menüngdak inyakertemjang tama aser tesashiba agi atongtsü. Ano, asen alidak, tangari masü, asenoki asenoksasa timtemi aitsüsa mopung menendaktsüba mapa kaji asenoki asen alidak kima aser atsü nung jana ona, talisa plastic oset tamajungtem bendena arongba ya lir. Asenok dak tajung kaji, asenoki asen alidak aser temeket kanga merüka yuner, anungji anogo shia aoker aser janaona bendena rongdoker. Ajisüaka, iba lagi kimabo merüker saka mopungbo menendaktsü. Ashiko, asenoki tang mopung menentsüsa inyakba mapatem ya metetsümonga mopung mendendaktsüdi ta ser inyakba mapatem masütsüa akok, kechiyong shibaibo pei alidak pei temang nung tashidat atutsüsa inyaktsü? Anungji, tang amai kodang Pollution Control Board ajanga nübortem nem tangatetba agütsüdir, nübortemia rajemtsü aser pei alidak tzü mopung menentsüsabo shingaia meyaktsü. Talisa asen lima nungbo tang Dimapur aser Kohima nung mopung menendakja aliba ya ajemaktsüsa asoshi tasakbo masütsü, kechiyong asenok alidak auyi mapungtsüsa inyaktsüba asenoki melamelaa inyaktetsü aser ano memetet aser junga mangatetba agi janaona mashi mashi bendena aronger dang ashi, asenoki kodang angatetdir asenoki janaona marongbo aremtsü. Tanü lima yabo janaona agi rongsen akumba lima lir. Aji oda, ali kuma aotsü akokba janaonatem agi ali temo kümaktsüsa inyaker aser ali kuma maotsüba plastic osettem agi ano tanaben menüngsar nüngdak osettem yanglur. Ibayongji, jana bendenbaren nunga ali kuma aotsüba jana ka nung aser ali kuma maotsüba jana ka nung ta tesem balala nung bendener. Atangji, asenok alidak mopung menena kümaka asenoki memeteti liasüba agi asenok zübäzaa liasü, ajisüaka tangbo asenoki asenok mopung tamajung chia aliba tiaji meteta kumer asünungji, asen alidak mopung meruktetsüba asenok mapa asütsü.

# OLEMSABANG

## Tetsür Aikadi Tia Raksar

~ S. T. Yapang Lkr, Kohima.

(International Women's Day tenüng nung memenui adoktsü aliba SHISASEN Yimdangjem (Fiction) otsü kaket nungi tatsüka agiteta lemsateper.)

Medemer Pangerba o Narola na meimtepa arur Narola shisa tatem nung la süoshi tajungtiba sobu, ola osü akhi dang nungi kanga agia tanepba agi jembidang, tedong Pangerba lar kidang mesüzüka chiyungdaktsüli, pai ngajanuba ama kidangji lidaktsüli ta khenbika ali, saka iba jagia Pangerba laktetatok. Narola taktang nungji pa kibur, koba mapang nung lapoktsü aser aotsü mesüra arutsü pa mulungka agi inyak, iba atemaji kecha ashilen mali, Narolai nüktü aneta anemsü agi menüremloksür. Pangerba opung nung shiba den kechi jembir memetet ammang sangwa jembia kazür, aser opungshiti ajenshibaji temeyonga kosüktsüsa ajenshir. Lai iba indangji langka danga asüngdangra yangji asateper yutsür aotsüji temetet dang.

Ya tanga agi masü, Pangerba joko pentokbentsü alu terep toktsür, luti koba nung züngi lanu aser menti talubusa angur iba lu lagi aotsü yongyaseta o jembiaka temulungbo maden, bentokbentsü nung tetsüng ajemoka ayu, saka tenük aser temulungjangbo luti nung yur o jembiba ajak rabalen jembir.

Anogo ishika lir Pangerbai Narola nem tola tajung ka alia bener arutsü, idangjia lai tajungtiba agi anepalua mejangdaktsü, ajisaka pabo ibaji salem ashii aruba dang liasü, lai tang tashi ibaji yua lir.

Anüng tema nung senzür amai pelatepa senzüa aliba to joko kimai alutsü akmesena aküm, ya tanga agi masü, pei mekümdangba ajanga aser asen oshi takara mesük sensakera mesük ta asüba dak tai tongloktsütsüsa akümer, kechiyong tanga oshi nungbo tenüng tajung aika alitsü südi, saka tetsür ka tebur ka, tena ki ka nung küleme lia, yipden ka nung küleme yipa alir dang asen oshi agi 'kibong' tasa ajar, anungji Narola Pangerba denji kibong tejen ka ta züngshir asünung amitsür rongnung züngsemtsüsa mapangi bener aru. Laibo laji aiür rongnung züngsemaktsünür, saka nüburibo amitsür rongnung züngshir.

Anosa lanuwa kü medemer ka dang ni tedong tena tesentaktep koma odar aser kibong akümtsü ta angashiar, aji shitak asü tai? ta asüngdang. Pai yamai langzü "Tang kechi kibong akümtsü indang jembitsüba? Tetsür atema kechi ali? Linüra alitsü melinüra malitsü. Tang alitsü malitsü indang jembitsü nüngdak madoker" ibaji pai dang masü tebur aika yimya.

Paji onok lanuwa küleme senzüdang tetsür kanga ajinüa liaka ka danga mangu, tesülen pa sorkar mapai aiba ajanga iba tetsürlaji ngushiba liasü. Ashiko sorkar mapaji mangu asübo arishi piyong Arju anüksü lemzüksangji pa süla kar.

Pa mapang entoka bushir anguba apibo pa taküm dena melenshir linütsüka aser tetsürlaji chubatsü ka ama tushia amshinütsüka surnung "Linüra alitsü, melinüra malitsü" ta jembia senzüba reprangang, akümlir mulungsentsüji koma yangji meteter.

Joko tetsürlaji tedongi yutsür ajentsü tsübuba agi menep, tamasabo la amui aotsü aser mapa inyaktsü mapanga mungui pai nüka liasü. Iba melena Laishiba nung "Tesüpür tama, tamapur tesü ta akümtsü" ta ashiba amato, laiang meyiper tedong to tangar tetsür den senzür asü masü? Kongisa aor? Ajakji ladangtsüsa aküm.

Auüra tepok sünge auya alidangang puteter ta Aori jembia aru ama aibelenbaji putetaka lai ibaji shira ibala nüngtem nungji asateper tedongi yutsür aotsüji temetetdang, asünungji nüktü yima temesüzük dang mesüzük. Ashiko akümlirisa imlar asünungji "Kenübo melenshijar" mesüra "Pai angateta melenshijar" ta aiben tedong dang meshitetaka temulungbo tzü kuma yimsaa yimya tajungtiba ajak sayudanger alitsü.

Laijü medemersang lagi kinungtsü ka amai küm anashi medema anishir toktsü. Tedong ta shidi asünung majung, tebuba ta ashitsüa mazümalem ta tebur ka den küm ishika meimtepa lir yutsür aoba tetsür ka mulungzürep, tejashiji kodaka alitsü! Naia ibala otsü angashidang shiba aitsütsü aser shiba metentsütsü? Tenaji alitsüsa ta jembia tebursang lagi kechisüdir süaka alitsü ta nangzüka tena shi ka kumer meimtepa lia aru, aser tena mejangdang tenangzükba aika nangzük. 'Tanü nungi kuna alir' ta mesangdong dangashi tena inyakyim aser libaliru ajak agi kibong ka dang, saka ola maka yutsür ao.

Lai tejashi nung joko arishi piyong tebur den memeimteptsü aser kibonga makümtsü mulunget. Aji tamashi mapa lir, shitakba agi lai tebur shibai la yutsür ao, par kibong dangji tajungba ka yangertetsü sentong yanglutsüla.

Taküm nung teyonyaba, tejangraba, tebilemba, nükjidong ajak la taküm lir surnung leper nung rema yutsü. Lai kenübo la külakoktsünsangji ajangeta aotsü, ajia/repranga alitsü ta biledar asütsü, ajisaka temeimtsüka la tepeetzük tia nungi anitetsü shinga mali nung lai biledabji Asüyim nung oa atalok mesüra iba akümlir lima nungbo mataloktsü. Khenkenbo Tsüngrema mali asü! Ta lai biledabji, ajisaka ibaji tenaprong temenen mapa nungi tedong pungeta aoba maparen ka dang. Tia maliri tia majung nemsä tongloktsüri lai tena meimtepa shi ka akümbaji temenen mapa inyakba masü, tedongi la ashioktsüba dang ta khurema alir, ibayongji alima nung mepelai alitsü shimiteter rongnung züngsem ka aküm. (Iba SHISASEN kaket yabo yoka mesenzütsü, Online aser kaket ayokdak dokan nung dang ayoktsü. Metettepa aliba nisung kati kaket yokyonga arura aikati malinüaka alitsüsa akümer, anungji item timtem nungi asen lima jenbuia lidaktsüsa asoshi mera tasen agir).

**Iba Olemsabang nung lemsaba ken-o aser shisatsü ya iba ocet züldü  
bilemba ken-o ama tazüngeri angateta agitsü mepishir**



March 4 nungi 10 tashi Yisemyong, SARS farmers hostel nung Waromung Baptist Arogo 2nd phase detox Camp kanga temoatsü ngu agiogo. Campers ajak agi 14 liasü. Mozümora aser temang anebalur Dr. Medem Mkg den nurse Kr. Ajungla liasü, shisalen sayurji Moatoshi Jamir Counsellor MTBA aser Rev. Akang Pastor Yisemyong B/A na liasü. Lokti aser kija shirnokisa yaritepogo Arogoi ajak dang kanga pelar, ta Waromung Baptist Arogo pastor Meren Mollier-i sangdong ka ajanga metedaktsü.

## Greek Orthodox Arogoi kasa kiyimba pusemer yimsüsür ana nokdang

**March 10, 2024:** Greek Orthodox Arogo kati linük nung kasa kiyimba (tebur o tebur na mesüra tetsür o tetsür na kiyimba) ozüng pusema vote agütsüba atema yimtenren lenir ana nokdangogo.

Tan hopta Corfu asetkong nung Arogo kettangsertemi sangdong ka ajanga, kasa kiyimba ozüng pusema vote agütsüba ajanga yimtenren lenirtemi taneli tsütsü aibelen tulu inyakogo, ta metedaktsü.

Arogoi sangdong ajanga, "Onok atemabo, item yimsüsür ana ya ozü Arogo nung züngsem tajung ama mezüngshir. Onoki tena dang aibelen nungi meyiptü ajungshir," ta metedaktsü.

Iba sangdong nungji yimsüsür ana tenüng metedakja mali. Kibuba benjung nung tena medendaktsü aser Orthodox Arogo sentongtem nunga medendaktsü, iba dak alia sentong balala nung Arogo lenirtemi tena nem akhüm magütsütsü.

Orthodox Arogoisa Parliament nung vote agütsütepang Arogo züngsem yimsüsür katibo kasa kiyimba ozüng anema vote agütsüba atema pelaba metedaktsü.

"Asen linük nung tangatetba balala liaka pa ama yimsüsür nüngdaker," ta Arogoi metedaktsü.

Taoba ita Greece Parliament nung kasa kiyimba ozüng agizüka liasü. Iba ozüng pusema vote 176 agütsü aser iba ozüng anema agütsüba vote bo 76 dang liasü.

Kasa kiyimba ozüng ajanga kiyimtsü melaba dang masa süaka kasa kiyimertemi tanurtem-a pei chir ama agitsü temelaba agütsü.

Greece Ato kilonser Kyriakos Mitsotakis-i aniba center-right sorkari renemba ozüngji left-wing party temia pusema liasü.

Greek Parliament nungiba ozüng agizükba sülen Greece Catholic bishops' conference-ia sashia aija liasü.

2023 küm June ita nung Mitsotakis-i aniba party-i tanaben takok anguba sülen kiyimba teratet melenshitsü atema taoba ita Parliament nung Marriage Bill ya benoka liasü, aser ibaji left-wing MP temia pusema agizük.

Kasa kiyimba ozüng benokba anema January 30 nü Greece nung Orthodox Arogoia yimjak nung shidi ka ajanga MP tem dang "Iba ya Khristan kiyimba aser akhidang nungi Greek nunger kibong teratet nungi pilaba lir," ta metedakja liasü.

Parliament nung anogo ananü tashi kasa kiyimba melatsü atema o lemtepa aruba sülen kasa kiyimba melatsü atema vote agütsütepa agizük.

Tang European Union nung züngsem linük 27 lir aser item linüktem nungi Greece densema linük 16-i kasa tetsür o tetsür na aser tebur o tebur na kiyimtsü melar. Alima nung kasa kiyimtsü melaba linük 37bubaji Greece kümogo.

## ANOGO ABEN TSÜNGREM DEN

### KIBUBA OLA TSÜTSÜ NE NARONG TENANG

...nenoktenarongi nenok tesülen ola kati shia angashitsü, lenmang ibai lir, iba nung jajang.

~ Isaia 30:21

Tanü Khristanpur aika pei teyanglur Tsüngrem nungi pilaa atsüngzüka oa temenen lenmang nung nemzübaji Tsüngrem nungi taneli temeshi tejembiba ola ka koba agi asenoki "Aba, oba" ta jaa jembir, iba ola mejangjai samaa kümadokba, ano ali shi tejangraba taginüba balala dak ranglokang tanelar tejembiba mangashi-i kümadokba ajanga lir. Khristan taküm ka tamang jenjang nung taneli temeshii jembiba ola tejangja maka tashi aibelenjen aibelenja atsüngzüka ojen dang aotsü.

I Samuel 28:6 nung yamai zülua angur, "...aser Kibubai pungmang nung súshia, Urimagi súshia, mesüra ainkar ajanga súshia pa dang melangzü." Saul chuba nungi Tsüngrem taneli pilaa pai asüngdanga Tsüngrem kecha melangzüksü akümbaji, Sauli pei mulungba dang inyaka Tsüngrem jashidaktsüba agi súnga liasü. Yamaji Saul chuba taküm tatempangji tansütsü kuma tanü tashi jembir.

Amangbapurtem, Kibuba ola angaa jajaba nungi asen narong meyipa oa, pa tanelai asen den jembiba mangashi-i kümra idangji asen Khristan taküm aser taneli tasüba lenmang nung jajadagi ta angatetdi. Arung, Kibubai jembiba ola nung tenarong nentaka angaa ochiba lenmang nungjajadi. Amen.

## Mozambique linük nung IS-M teloki Khristantem jenti tepseter

**March 10, 2024:** Akhidangbo Mozambique linük nung Khristantem aser Muslim nunger tsüngda tesüne nung dang lia aruogo, ajisüaka Muslim yimsü alia amangertem aser kiralongrartem poktetba ajanga iba linük nung Khristantem kanga timtemdar, ta International Christian Concern (ICC)-i metedaktsü.

IS-M züngsem meyirjang aika kümogo aser parnok ket nung raraba hadir tajung aliba ajanga ozüng alema inyakba kanga bulua kümogo. Khristantem dang masü saka local Muslim lenirtemia kiralongrartem amakbaatalokbatem aitsü.

2021 küm August 6 nü US Secretary of State Antony Blinken-i IS-M lenirtem-Bonomade Machude Omar aser Ibn Omar na ya 'Alima nung kiralongrartem'ta sangdonga liasü.

2021 küm Open Doors-i Mozambique ya World Watch List nung züngokogo aser alima nung Khristantem tamajungtiba reshikangshiba linük 50 rongnung iba linük ya jenjang 45buba nung lir.

Taküm January 4 nü IS-M-i Khristantem anema mapatong ka tenzükogo. Parnoki "Nai parnok (Khristantem) kong ajurudir tepsetang' omen nung iba mapatong tenzükba sülen hopta ka tsüngda Mozambique kübok Cabo Delgado province nung Khristantem tiben maakogo.

"Khrista nung temang ka ama asenoki Mozambique nung asen adianutem atema sarasademtsütsüla," ta ICC-i ayongzük.

## 'Jesus Revolution' aser 'Sound of Freedom'-i Movieguide award angu

**March 10, 2024:** Khristan film "Jesus Revolution" aser "Super Mario Bros Movie," den actors Dennis Quaid aser Lori Loughlin nungeri 31buba Movieguide Faith & Values Awards sentong nung awards nguogo.

Award sentong ya February 9 nü Avalon Theatre, Hollywood nung Trevor Donovan aser Danica McKellar nati kettangsüa agi aser March 7 nü Great American Family nung sayu.

"Super Mario Bros Movie" ajanga Best Family Movie award agizük aser "A Paris Christmas Waltz" film ajanga Best Family TV award angu.

"Jesus Revolution" film ajanga Best Movie for Mature Audiences award aser "Chicago P.D." episode "New Life" ajanga Best TV for

Mature Audiences award angu.

"Sound of Freedom" film ajanga Faith & Freedom Award for Movies angu. Iba film nung Jim Caviezel-i tongti shilem agia lir.

Award sentong nungsa Quaid aser Grammy atema shima aliba Blessing Offor-i ken aten. "Full House" actress Candace Cameron Bure-i sarasadema iba sentong tembangga liasü.

Movieguide executive producer aser publisher, Ted Baehr-i, "Küm 31 nung tang agiba sentong ya tajungtiba aser temoatsüta lir. Tsüngrem taichi atema ni kanga pelar. Iba sentong takok angutsüsa shilem agir ajak dang pelar," ta metedaktsü.

Khristan yimsü dak

sendakba film aser television series atema 2023 küm ya kanga takok anguba küm ka liasü.

2023 küm tetenzüklen Lionsgate indang "Jesus Revolution" film sayaa liasü. Iba film ajanga US nung dollar sen million 52 aazüka liasü aser iba film ajanga A+ CinemaScore grade angu.

Ano Angel Studio indang "Sound of Freedom" ajanga alima tesem ajaklen dollar sen million 250 jungnúa aazükteta liasü.

"Jesus Revolution," film direct asürtem rongnung ka, Andy Erwin-i, "Item ama yimsü dak sendakba film tem takok anguba ajanga Hollywood nung tamang dak sendakba film tem asentenshiba kuli angur," ta metedaktsü.

2017 küm October ita nungi tenzükä tang tashi nung Mozambique nung Khristan 1,800 nungi 3,000 shi tepsetogo aser nisung million ka jungnúa jensiogo.

Iba linük nung aluyimer Khristantem meyong yimtsüng

**AO OSHI ANGAZÜKDAK:****TANÜ ANGAZÜKTSÜBA OJANG****Sosem****(n)** kijemba ajanga jala jabaso agi sendaktepba ( blood relation)

\* Nisung tajung den sosemba agi anisüngzüka alir.

**Sosemtangsem****(n)** kibalembu ajanga sendaktepba kinunger adianutem (close relatives)

\* Sosemtangsem aika aliba agi teyari tajung angur.

**OLONG PAITEP # 6723**

1	2		3	4	5
		6			
	7	8			
9			10		11 12
		13		14 15	
16			17		18
		19	20		
21	22				23
24					

**TIPLÉN**

1. Saku  
6. Songjen  
7. Mali/Tazung  
9. Tasen apok  
11. Songtem  
13. Ata liasü  
16. Tüngluden külemitsüker  
17. Aso tila  
20. Tashi maküm  
24. Tenüng kasa jatepba  
25. Ki yangluba oset

**LANGTSÜNGLEN**

1. Taksep  
2. Langtem  
3. O tamendaktak  
4. Nütüs tebuba  
5. Anüngdang tesangwa  
6. Apitet  
7. Yagi jungdaktsür  
8. Anogo semer ka  
10. tatsü  
12. Tebur kidong aser zünga  
kasatsüngda jatepba  
14. Pela agizükba tapu ka  
15. Tenüng atet  
18. Mejanga onü  
19. Talak techira  
21. Maneni  
22. Nübo teyi  
23. Meshi

**OLONG PAITEP # 6722 TELANGZÜBA****TIPLÉN :**

2. Pongsen, 5. Lepko, 7. Omen,  
8. Maongka, 10. Yangkhu,  
12. Senpong, 14. Angu,  
15. Raksa, 16. Arameso,

**LANGTSÜNGLEN :**

1. Alimang, 2. Pongan,  
3. Samaru, 4. Nün, 6. Pio,  
9. Nüngdak, 10. Yongya,  
11. Kongro, 13. Ora, 14. Ata.

**NAI-A YA METETTER MA**

Czech Republic tsür Krystyna Pyszkova-i Miss World 2024 takok korang nguogo. Küm 28 sülen 71 buba Miss World 2024 sentong India nung ayonga agi. March 9, 2024 nü BKC, Mumbai nung aliba Jio World Centre nung iba sentong agi aser Miss Lebanon Yasmina Zaytoun-i first runner-up takok angu.

**TENÜNG**

KÜM

Anogo

Talidak

Temeim jala küm 8 tashi Tsüngremer taochi nung len aniba asoshi Tsüngrem tenüng asanger, ano na arishi talang den anema aliba maneni moajang ta onoki sarasademsür.

: IMTIYALA

: 8

: March 11

: Kohima

~ Temeim Oja &amp; Oya

**Dibrugarh University nung 22 buba convocation agi****XXII CONVOCATION, 2024****Dibrugarh University****দ্বাৰিংশতিম দীক্ষান্ত সমাবেহ, ২০২৪****ডিব্ৰুগড় বিশ্ববিদ্যালয়****10th March, 2024****Dibrugarh, March 10, 2024****(Agencies):** Deobarnü Dibrugarh University 22 buba Convocation agi aser Ph.D. angur 87 den kaketshir 10,765 graduate süogo.

Taküm graduating class rongnung exceptional students 37 nem gold medals agütsü.

Maneni Department of Anthropology nung marks teimtiba anguba atema kaketshir ka nem Dr. Junali Kropi Memorial Award agütsüogo.

Iba sentong ya Assam Governor aser Dibrugarh University Chancellor Gulab Chand Kataria ketdangsüa agi.

"National Education Policy (NEP) 2020 nung interdisciplinary education tangatetba

tongti süa benoka lir. Anungji university-i iba tangatetba ya curriculum nung enoksemtsüla aser kaketshir tem anitetsüla" ta Kataria-i ayongzük.

"Dibrugarh University-i Rs 100 crore grant anguba atema tenüng sang agütsür. Iba sen amshia Indian university tem rongnung tajungtiba ka akümtsü merangtsüla" ta Governor-isa ashı.

Paisa university temi Indian Knowledge Systems ajungketsü aser temulung agütsütsü ayongzük.

"Prime Minister Narendra Modi-i anir Centre sorkari PM-USHA Scheme kubok Rs 100 crore Multidisciplinary Education and Research University (MERU)

**Tripura: Lok Sabha election atema CAPF company 70 lemzüksü****Agartala, March 10, 2024****(Agencies):** Lok Sabha election agitsü mapang tonga arudang Tripura nung Central Armed Paramilitary Forces (CAPF) company 70 shi aruogo.

"Lok Sabha election yakta sangdongtsü akok aser iba team Tripura Police aser Tripura sorkari Centre o Election Commission of India (ECI) dang CAPF mapa lemzüksütsü

mepishiogo" ta Tripura Police ketdangsüri kati ashı.

"Onoki election tiptema aginür aser iba atema Centre o ECI dang CAPF tekaraba nung lemzüksütsü mepishiogo" ta pai ashı.

Centre sorkaria CPAF yoktsü mulung aser yokogo. Onoki CAPF company 70 meshi aser parnok Tripura-i yokogo ta police ketdangstırısa ashı.

CRPF, CISF, BSF aser tanga

central law enforcement agencies 8,000 tema aruogo.

CAPF company 70 dak alia Tripura State Rifles (TSR) personnel mapa lemzüksüog, ta paisa ashı.

"CAPF ya shilem ana lemsar aru. March 1, 2024 nung company 50 shi aru aser tanabuba shilem March 7 nü tanüngba company 20 aru" ta paisa metedaktsü.

**Manipur nung mezüngbuba first water amusement park lapoktsü****Guwahati, March 10, 2024****(Agencies):** Manipur nung mezüngbuba water amusement park taküm March 13 nü sayatsü.

Iba mapatong ya Manipur Police Housing Corporation Limited-i anir inyaker aser state sorkari taruba Bodbari sayatsü

sentong lir.

Water amusement park ya Imphal nungi kilometre 12 shi pilar lir aser recreational opportunities aika dena lir.

Honibarnü Manipur Chief Minister N Biren Singh den state Chief Secretary Vineet Joshi aser

tangartemi park semdangogo.

"Awang Potsangbam Khunou, Imphal East nung water

amusement park semdangogo. Iba park ajanga recreational opportunities agütsütsü. Iba park

ajanga lokti, kibongtem aser kijatem jangra atemtsü" ta CM

Biren Singh-i metedaktsü.



Arunachal Pradesh kubok Tawang district nung Gorsam Kora Festival takok ngua tembangogo. Iba benjung ya kumshia Zemithang valley nung ayonga amonger aser India o Bhutan tsüngda alemli nungi tesentaktep tajung aliba atema benjungteper. Zemithang ya Nyanmjang Chu River ayong anasa lir aser iba tesem ya kanga tongtipang lir kechiyong 1959 küm 14 buba Dalai Lamai-i Tibet nungi jena arur idaki jenok. Benjungji Gorsam Chorten nung among aser iba ya Putu 13 buba (AD) nung local monk Lama Pradhar-i azüklen feet 93 talang tekülem ki ka yangluba lir.

# Nigeria nung school ka nungi kaketshir 15 pur ao

Abuja, Metsüremi/March 10 (Agencies): Ozüng alema

inyaksangshiba telok kati prangbong aser hadir balala bener Nigeria nung boarding school ka nungi kaketshir 15 purogo.

School tanga ka nung kaketshir 280 dak tema pur aoba sülen anogo ishika lir tang item kaketshirtem pua benerogo. Army temi item kaketshirtem bushiba mapang ka lir.

Item nisungtem ya Sokoto state kübok Gidan Bakuso yimtsüng nung Honibarnü Islamic seminary kati ai aser tanurtem hostel nung meja aliba mapang parnok 15 pua bener ao, ta police-i Associated Press news agency dang ashi.

Seminary tekolakba Liman Abubakar-i ashiba agi, kaketshirtem ya arishi küm ti nungi 14 tsüngda liasü.

Sokoto police otongdar Ahmad Rufai-i AP dang, kinük nung aliba yimtsüng ka nungi ano tetsür ka pua benerogo ta ashiba den, kaketshirtem bushitsü atema police tactical squad ka yokogo, ta shisem.

Taoba hopta nungi tang tashi nung Nigeria anütok tiplen ozüng alema inyaksangshirtemi nisung telok asem tashi pua benerogo. Taoba hopta Borno state nung nisung 200 dak tema pua benerogo, kong tetsür aser tanurtem timba liasü.

Brehostibarnü Kaduna state nung government primary and secondary school

ka nungi kaketshir 287 pua bener oa liasü.

Nigeria sorkari northwestern Kaduna state kübok Kuriga nungi Brehostibarnü kaketshir 287 pua bener aoba bushia aliba mapang ka nung Honibarnü ano kaketshir 15 ya pua benerogo. Brehostibarnü nisung 287 pua bener aoba ya taküm küm nisung timtiba pua bener aoba asütsü.

Kuriga nung alirtemi Al Jazeera osangbener Ahmed Idris dang ashiba agi, tanurtem ya anogoshi agiba assembly agiba sülen nisung 100 dak tema arua pua bener ao. Parnokisa sorkari parnok sentoka toktsür ama bilemba lemsatepa liasü.

"Parnoki kecha taochi makai injang khaloktsü aser nashi meinshiba ama onok meinshia liasü," ta jena aoer kaketshirtem rongnungi Mustafa Abubakar-i Kuriga nung Al Jazeera dang ashi.

Abubakar-isa, pa jena mao tsüngda military jet tem parnok kolak nung anaben tashi yima aoba indang lemsatep. "Mapang ka nungbo talangka khtepa liasü, saka injang ya tayimtsü nungi khaloktsü asü onok pur aoertem akha aji mejangga," ta pai ashi.

Kasa mapang nung tesayur Nura Ahmad-i ashiba agi, Kuriga secondary school nungi tanur 187 aser tanga primary school ka nungi tanur 100 purogo.

Primary aser secondary

school anaprongla nungi osang agütsüba mapang Idris-i ashiba

agi, school tem ya taoba mapang amenoka aliba nungi melenshir liasü, kechiyong mezüngbuba school ya kanga tekümzükba kübok maliasü aser tangari amaktsü kanga mela liasü. Nigeria anütoktiplen iba amala tatalokba ajanga school aika shibangogo.

Iba amala tatalokba ajanga iba tesem nung kaketshirtem kanga ajema kümogo, ta Idris-i ashiba den, iba ajanga sorkar aser aid agencies tem Nigeria nung tanur million aika tarutsü atema shisabulua bilemer, ta shisem.

Kaduna Governor Uba Sani-i, tanurtem meyipa anir arutsü atema security forces temi tanen makai inyakdar, ta meteddkatsü.

"Kibong tem nung yimzung mali aser onok animesüngzükteti lir," ta tsürapur rongnung Shehu Lawal-i Al Jazeera dang ashi. "Yimtsüng nung alirtem memejangteter aser achi ajema mesüteter. Onok anüngdangang kidangi arur aser aonung tekümzükba bushia oa mejanger. Tanurtem pur aoba sülen onok taküm yamaji kümogo," ta Lawal-i ash.

Nigeria Tir Bola Tinubu-i, security forces tem nem item teloktem bushia aotsü atema tetuyuba agütsüogo, ajisüaka linük nung tebilemtsü aika aliba ajanga military-ia mayimjemi kümogo.

jala Benazir Bhutto den kibong akum, shiba December 2007 nung tepset.

Kasa mapang PTI-Sunni Ittehad Council (SIC) alliance ajanga leader of opposition inyaktsü atema Omar Ayub Khan shimogo aser Honibarnü National Assembly Speaker Sardar Ayaz Sadiq nem pa indang documents agütsüogo.

Wazüka aliba menden tem agitsü nükjidong nung Pakistan Tehreek-i-Insaf (PTI) nungi National Assembly züngsem 90 shi general elections nung toktepba sülen SIC nung oa aden.

Nomination paper ya SIC lenir Sahib-zada Hamid Raza, National Assembly züngsem Ali Mohammad Khan, Riaz Fatyana, Dr Nisar Ahmad Jatt aser dangartem lia Malik Amir Dogar-i agütsü.

Ajisüaka leader of opposition ya March 13 mesüra 14 nü shimtsü aser nomination asü election ajanga shimtsüar ano mejangga.



Office of the  
AKHOYA KAKETSHIR TELONGJEM, KOHIMA

Estd : 1988

Kohima : Nagaland - 797001

Dated : 12/03/2024

## Tenüngsang Agütsür



Akhoya Kaketshir Telongjem kohima nungi zungsem tajung Sp. SHILURENEM LONGKUMER , Lt Emkong Tonger aser watsü Lemjan Phom na jabosoi NPSC-3/CTSE Examination 2023 agiba nung Extension officer Sericulture Department Government of Nagaland, 1st Rank nung takokanguba asoshi pelaba lemsateper aser Tsungrem tenung asanger.Ano Tsungremi maneni ne mapa aser wadang balala nung takok aser temoatsü lidakjang ta sarasadema asen Akhoya Kaketshir Telongjem Kohima Office ajanga pelaba lemsateper.

Sd/-  
Lanuyanger  
President

Sd/-  
Nukshilila  
General Secretary

## TENÜNGSANG AGÜTSÜR

Wb. Lanutemjen Jamir aser Wt. Luenchila Walling na jabaso Mr. Tiatemu Jamir, NPSC tatiang nung Agriculture Inspector (Class-III Non - Gazatted) under Agriculture Department anguba asoshi Longsa Lumong Kidong Dimapur ajanga tenüngsang agütsür.

Tsüngremi pa taküm aser tenzükba wadang maneni moajangma ta sarasademsür.

Sd/-  
Longsa Lumong Kidong  
Dimapur

## Gaza nung rongnendak tesem yanglutsü US mitkar rong ayamesogo

Washington, Metsüremi/ March 10 (Agencies): Gaza melapokteti nisung pongu onset ta ashir.

Biden-i sangdonger ghonda 36 majungdang iba rong ya ayameso ta US Central Command ajanga X nung zülu liasü.

Sepai 1,000 teyari nung pier yanglutsü ya anogo 60 tashi agitsü akok, aser sepaitem kata tzükum leni maotsü, ta Pentagon-i ashi.

Ano Deobar nikongdang Larnaca, Cyprus nung aliba rongnendak tesem ka nungi chiyongtsü tonne 200 shi bena aliba rong ka ayamesotsü lir ta osang ajanga ashir.

Gaza Strip nung ayawara mepaidoktet kimogo aser tila tanurtem aya agi asür, ta United Nations-i tekumdagtsü shia lir. osang ya angashir.

Gaza den anasatiba EU linük, Cyprus nungi indang indanga teyari oset bener otsütsü asoshi hopta tatemi tzü lenmang tasen ka lapoktsü, ta EU-i sangdonger liasü.

Gaza nung rongnendak tesemtem kata shidak mali aser müketa aliba tzü ya rong tulu asoshi tarok masü.

Hamas teloki October 7 nü Israel south tsütsü nisung 1,200 shi tepsetba den 253 shi pua bener aoba ajanga Israel-i Gaza Strip amak tenzük.

Tang tashinung Gaza nung nisung 30,900 dak tema tepsetogo, ta Hamas meyong health ministry ajanga ashir.

# Pakistan indang tir inyaktsü Asif Ali Zardari tenangzükba agiogo

I s l a m a b a d , MetsüremiMarch 10

(Agencies): Yimten yimsüsür tejen Asif Ali Zardari ya Pakistan tir inyaktsü shimer anogo ka lir Pakistan indang tir 14 buba inyaktsü Deobarnü tenangzükba agiogo. Arishi küm 68 tain Zardari tenangzükba maparen ya Pakistan indang Chief Justice Qazi Faez Isa-i Aiwan-e-Sadr nung aliba Presidential Palace nung ketdangsüa agia liasü.

Zardari yagi Dr Arif Alvi melentsü, shiba September 2023 nung küm pongu kümsük tembangaka ita pongu tali inyaka arur. Iba tenangzükba agiba sentong nung Ato Kilsoner Shehzad Sharif, sepai telok asem nungi tekolak, ketdangsür aser bendang lima nungi arua aliba diplomats tem dena liasü.

Pakistan Peoples' Party (PPP) indang co-chairman Zardari ya ruling alliance indang candidate liasü aser Honibarnü PTI-i yariba Sunni Ittehad Council (SIC)

candidate Mahmood Khan Achakzai madak vote aika agi takok anguba sülen linük indang tir inyaktsü tanaben shimet.

Pai Parliament aser provincial assembly peziüprong nung electoral votes 411 angu, shiba Pakistan Muslim League-Nawaz (PML-N) aser Muttahida Qaumi Movement-Pakistan (MQM-P) nungeri bhukuma liasü.

Pa den toktepsang Achakzai-i vote 181 angu, kechiaser pai vote timba PTI-i yariba SIC ajanga amokbanga aliba Khyber Pakhtunkhwa Assembly nungi deng ngua liasü.

Zardari ya Pakistan indang tir tanaben inyaktsü. Pai 2008 nungi 2013 tashi Pakistan indang tir 11 buba inyaka liasü aser August 2018 nungi National Assembly of Pakistan nungi züngsem ama arur.

1955 küm sor Zardari ya Karachi nung zünga intet. Pa ya Pakistan indang taoba ato kilonser Zulfikar Ali Bhutto'er

jala Benazir Bhutto den kibong akum, shiba December 2007 nung tepset.

Khan shimogo aser Honibarnü National Assembly Speaker Sardar Ayaz Sadiq nem pa indang documents agütsüogo.

Wazüka aliba menden tem agitsü nükjidong nung Pakistan Tehreek-i-Insaf (PTI) nungi National Assembly züngsem 90 shi general elections nung toktepba sülen SIC nung oa aden.

Nomination paper ya SIC lenir Sahib-zada Hamid Raza, National Assembly züngsem Ali Mohammad Khan, Riaz Fatyana, Dr Nisar Ahmad Jatt aser dangartem lia Malik Amir Dogar-i agütsü.

Ajisüaka leader of opposition ya March 13 mesüra 14 nü shimtsü aser nomination asü election ajanga shimtsüar ano mejangga.

## 29buba NWA Naga wrestling championship March 26 nü asayatsü



**Kohima, Metsüremi/March 10 (TYO):** 29buba Naga Wrestling Championship March 26 nü ayongzüka asayatsü atema Nagaland Wrestling Association (NWA) renemdar. Iba asayamung ya Indira Gandhi Stadium Kohima nung asayatsü.

Ajak senteper Angami, Chakhesang aser Zeliang Wrestling Associations nungi asayar 54 (Association shia nungi asayar 18) temaba jenjang atema tokteptsü, ta NWA tir Dr Hiabe Zeliang-i, Deobarnü NOA Complex nung osangbenertem den sensaksema mapang ashi.

Asayamung akoker nem senpet sen lakh 3.2 den Velahü Puroi award 30,000 ta ajak senteper lakh 3.5 agütsütsü, tanabuba nem senpet sen lakh

2.2, tasembuba nem lakh 1.5 aser pezübuba nem lakh 1.2 agütsütsü. Septep den külemi kuli kaket dena agütsütsü. Quarter nung tamakok angurtem nema senpet sen 25,000 agütsütsü aser Group champion nem senpet sen 30,000 agütsütsü.

Asayamung lapokba sentong nung Nagaland Chief Minister Neiphiu Rio tongti tejaoker aser Deputy Chief Minister T R Zeliang tetushi tejaoker asütsü aser world wrestling bodies nungi ketdangsürtem bendanger tetushi tejaokertem asütsü.

Wrestling asaya meimer Manho Cakrño, 29buba NWA championship ambassador asütsü. Pa kanga tain kümaka Northern Angami Wrestling asayamung kanga jangrabangra

reprangogo aser iba den Chakhesang Wrestling Championship reprangtsü atema Phek district kübok Chozuba tonga oa liasü.

Iba asayamung repranger 25-30,000 arutsü asayamunger ayongertemi imlar, ta ashiba den Dr Zeliang-isa Botsa Baptist Church-i ground achaayangtsü ta metetdakstsü.

Kasa mapang nung NWA general secretary Vilekho Bio-i ashiba agi, donor ticket jenjang 30,000, chair 1000 aser 500 aser gallery 100 asütsü.

Ground Management Team representative, Kechangulie Kense-i ashiba agi, asayamung asayatsü aliba tesem ya talangka pilar asünung parnoki nüburtem senzüsenpongtsü atema bus aser taxi anepalutsütsü.

## Bajrang aser Ravi na selection trials nung tsükogo



**Metsüremi/March 10, 2024 (Agencies):** International asayamung balala atema tang asaya aliba selection trials nung Deobarnü Bajrang Punia aser Ravi Dahiya naprongla pei tata asaya mekoki tsükogo.

Punia, shiba WFI tir Brij Bhushan Sharan Singh anema nokdakertem rongnung ka lir, pa tebur freestyle 65kg semifinal nung Rohit Kumar-i 1-9 agi koka liasü.

Iba masüdang Punia-i Ravinder-a (3-3 on criteria) tera agi dang koka liasü. Ravinder caution point ka machi asübo Punia mezüngbuba bout nung tsükatoker lila.

Asaya makokba sülen Punia, Sports Authority of India (SAI) Centre kanga kara toktsür ao. National Anti-Doping Agency (NADA) ketdangsürtemi dope test atema Punia ket nungi sample agizüksü merang saka pai tasembuba aser pezübuba jenjang atema-a matai oadok.

Trails nung shilem agitsü atema Punia Russia nung training agia liasü. Iba asayamung ya IOA ad-hoc panel ayongzüka asaya liasü.

Tebur 57kg category asaya koba Nordic format nung asaya liasü, iba category ya kanga mezüngbuba bout nung tsükatoker lila.

Games silver medallist Ravi Dahiya aser tang kanga junga asaya alisang Aman Sehrawat naprongla iba category nung liasü.

Dahiya shiba yiruba ajanga masayai liasü pa mezüngbuba bout nung Aman-i 13-14 agi kokogo. 2023 küm asayamung timbaka nung medal anguba sülen Aman ya kanga nüngtugu kümogo.

Iba asaya sülen Dahiya-i ano U20 Asian champion Udit mekoki tsükogo.

Iba trials nung takok angurtem Asian aser World Olympic Qualifiers nung asayatsü asoshi maongka angutsü.

## ICC Test Team Rankings nung India No.1 kümogo

**New Delhi, Metsüremi/March 10 (Agencies):** England den Test asayamung 4-1 agi kanga junga akokba sülen ICC Men's Test Team Rankings nung India team-i Australia ajateta maneni temaba jenjang-i tuogo.

Hyderabad nung mezüngbuba Test asaya mekoaka, tanungba asaya pezü nung India team-i kanga jung asaya asayamung akokba ajanga parnok temaba jenjang tongtetogo.

India team-i Vizag, Rajkot, Ranchi, aser Dharamsala nung asaya ajak kanga junga koka parnoki rating point 122 angu aser temaba jenjang tongtetogo.

India sülen tanabuba jenjang nung Australia lir. Parnoki rating points 117 ngua lir. Tasembuba jenjang nung rating point 111 nguteta England team tasembuba jenjang nung lir.

New Zealand aser Australia na tang Christchurch nung asaya aliba Test shibai kokaka India jenjang nung lir.

Maneni India team ICC World Test Championship Standings table nunga temaba jenjang nung lir.

## Indian Wells Open: Sabalenka & Djokovic nati takok angu



**Metsüremi/March 10, 2024 (Agencies):** Indian Wells Masters nung Honibarnü Australian Open champion Aryna Sabalenka-i match points pezü kümzükba den match points pezü nüngdaka asayaba sülen 6-7 (2/7), 6-2, 7-6 (8/6) agi Payton Stearns madak takok nguogo.

Sabalenka, shiba February ita Dubai nung mezüngbuba asaya nung tsüka liasü, la iba asaya tetenzük nungi kanga kangshia asaya, ajisüaka lai tasembuba set nung Stearns 5-4 aser 40-0 agi tejakdang aliba mapang service break süa 5-5 aküm.

Iba sülen Stearns-i ano Sabakenka indang serve ka break asü saka la indang service game mekoktei Sabalenka nem kokdakstsü aser tiebreaker asayatsü asüm, koba Sabalenka-i koka tasembuba round-i iogo.

Tetsür asaya nung ano Coco Gauff-ia France tsür Clara Burel 2-6, 6-3, 7-6 (7/4) agi kokogo aser Naomi Osaka-ia 7-5, 6-3 agi Liudmila Samsonova kokogo.

**BILEMDANGANG**  
"Kechi majunga ta reprangteter aji tebensi."